



21. august 2020

UKA 2020/54

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Atuarfik pillugu inatsisip atuuttup<sup>1</sup> allangortinneqarnissaanut, taamalu meeqqat atuarianni tamani isumaginninnermut siunnersortimik imaluunniit inummik isumalluutigineqarsinnaasumik minnerpaamik ataatsimik atorfinitsisoqartarlernissaa anguniarlugu siunnersuusiornissaamut Naalakkersuisut peqquneqarnissaannik Inatsisartut aalajangiiffigisassaattut siunnersuut. Meeqqat pisariaqartitsisut atuariimmuut tunngassuteqanngitsunik ajornartorsiutigisinnaasaminnik oqaasinngortitsinissamut, ikiorneqarnissamullu periarfissinneqarnissaat atorfinitsitsinerup qulakkiissavaa.**

(Inatsisartunut ilaasortaq Nivi Olsen, Demokraatit)

### **Tungavilersuut**

Meeqqat amerlasoorpassuarnik ajornartorsiuteqarsinnaasarput. Ilai angajoqqaatillu ajornartorsiuteqartarput, allat ulluinnarni qingasaarneqartarput, allallu ilinniartitsisutik ajornartorsiutigisarpaat. Ajornartorsiutit assigiissutigaaat oqaasinngortikkuminaassinnaasarmata. Meeqqalluunniit toqqissisimanartunik angerlarsimaffillit qaammaterpassuit oqarnaveersaarsinnaasarput soorlu atuariimmi qingasaarneqarsimagunik.

Demokraatini meeqqat atugarissaarnissaat sammisani pingaarnersaavoq. Toqqissisimanartumik, ingerlalluartumillu meeraaneq ilinniarluarnissamut, inuunerissuunissamullu pingaarnersaavoq. Taamaammallu meerartagut ikiortinnissamut periarfissilluarnissaat pingaaruteqarpoq, taamaalinikkut ajornartorsiutiminnik aaqiisinnaanngornerussammat. Ullumi kommuunit ataasiakkaat namminneq aaliangertarpaat isumaginninnermut siunnersortimik/inummik isumalluutigineqarsinnaasumik atuariimmi atorfinitsitsissanerlutik. Demokraatini isumaqarpugut inuup taassuma ilinniartut atugarissaarneranut, kingunerisaanillu ilinniarluarsinnaaneranut iluaqutaalluarsinnaammat inatsisitigut piumasagaataasariaqartoq.

Kommuunini isumaginninnermut allaffeqarfiit suliassanik ulikkaareerput, nassuerutigisariaqarparpullu meeqqat ikittuinnaat nammineerlutik kommuuniliarlutik isumaginninnermut siunnersortimut saaffiginnittarmata. Taamaammallu pingaaruteqarpoq isumaginninnermut siunnersortimik imaluunniit inummik allamik suliamut piginnaaneqarluartumik meeqqanut ornigutsitsinissaq periarfissanngortinnissaa politikertut akisussaaffigaarput.

Isumaqarpugut ajornartorsiuterpassuit, unammilligassarpasuillu aaqqiivgineqarsinnaasasut, meeqqat ikiorneqarnissamut periarfissaannik pitsanngorsaagutta.

---

<sup>1</sup> Atuarfik pillugu Inatsisartut inatsississaattut siunnersuut nr. 15, 3. December 2012-imeersoq kingusinnerusukkut allannguutit ilanngullugit



Sumiiffinni meeqqat amerlanertigut ullut tamaviisa ornittagaanni tassaavoq atuarfik. Taamaammallu meeqqat isumaginninnermut siunnersortimik imaluunniit inummik allamik suliamut piginnaaneqarluartumik ornittagassaannik periarfissinnissaat meeqqat atuarfiat piffinni tulluurtuuvoq. Tamatumuunalu isumaginninnermut siunnersortinik amingaateqarnerput aamma eqqaarsaatigisariaqaratsigu – taaguut inuk isumalluutigineqarsinnaasoq atortaqaattaarpara. Taaguutip taassuma inuttarisinnaavai ilinniartitsisut, perorsaasut (pædagogit), peqqissaasut imaluunniit suliassaminut ilinniarsimasut allat meeqqaanik ajornartorsiutilinnik sullissinnermut misilittagaqarlutillu pikkoriffeqartut.

Demokraatit isumaqarput suliniut nassuiarneqartup meeqqat inuttut ajornartorsiutaanik ersitsitseqataasinnaasoq, taamaalinnikkullu meeqqat atuarfiannit angusarissaarnerullutik naammassinnissinnaanissaanut aqcutissiusseqataasuusinnalluni. Isumaginninnermut siunnersortitut imaluunniit inuk suliamut piginnaaneqarluartut atorfilik aamma eqimattani ajornartorsiutinik, soorlu qinngasaarinerit, naamaarniartarnerit, pisiniarfinnut tillinniartarnerit il. il. paasineqarnerinut ikiuutaasinnaavoq.

Soorunami atorfillip taassuma kommuunini isumaginninnermut allaffeqarfinnit suleqateqartarnissaa tupinnartuliaanngilaq. Isumaqarpugut matumuuna siunnersuutip naammassineqarneratigut meeqqanut ataasiakkaanut, ilaqaataasunullu qaninnernut pilersaarutinik suliaqartarnissaaq, atulersitsisarnerillu ajornannginnerulissasut. Meeqqat ataasiakkaat meeraanerat toqqissisimanartuunissaa pisortanit qulakkeerneqassappat, meeqqap ajornartorsiutaanik inuuneranillu ilisimasaqarluarnissaaq pisariaqavissorpoq. Atuarfimmi isumaginninnermut siunnersorti/inuk isumalluutigineqarsinnaasoq suliap ingerlaneranut pingaaruteqarluinnartutut inississinnaapput.

Demokraatit neriutigaat Naalakkersuisunit, Inatsisartunilu partiinit allanik siunnersuut manna amerlasuunit tapersersorneqarluarumaartoq.

### **Pisortanut aningaasaqarnikkut allaffissornikkullu kingunerisassai**

Siunnersuutip akuerineratigut akissarsianut aningaasartuutitaqaasaaq. Nalilerneqarpoq isumaginninnermut siunnersortimut ataatsimut aningaasarsianut allanullu aningaasartuutissat 500.000 koruuniussasut. Illoqarfinni meeqqat aturfii 24-iupput, tamannalu katillugu komuuninut ukiumut aningaasartuutissat 12 mio koruuniussapput, taamaattorli meeqqat aturfii ataasiakkaat ullumikkut isumaginninnermut siunnersortimik akuerisaareersunik atorfinitsitsinikuupput, taamaalilluni siunnersuutip malitsigisaanik aningaasartuutissanut årsværkimut tassunga nalinganut apparsaataassaaq.

Taassumallu saniatigut siunnersuuteqarnissamut meeqqat aturfia pillugu inatsip allanngortinnissaanut suliassaaq ½ AC- årsværkimik naleqassasoq nalilerneqarpoq, tassa 250.000 kr. Aningaasartuutaasussalli appartinneqarsinnaassagunarput allannguut, massakkut ilinniarfeqarnermut tunngatillugu aqqissuusseqqinnermut allannguutaasussanut suliaqarnermi ilanngunneqartuuppat.

### **Inuussutissarsiornermut aningaasaqarnikkut allaffissornikkullu kingunerisassai**

Soqanngilaq



**Innuttaasunut aningaasaqarnikkut allaffissornikkullu kingunerisassai**  
Soqanngilaq.